

Rapport annual per la radunonza generala dil  
Chor de Vallada dils .27.11.1962.

Preciau sgr. dirigent  
Preciai cantadurs.

Tenor art 5 de nossas statutas duei la radunonza generala vegnir convocada enteifer il meins november. Quei mument ei pia arrivaus, nua che nus havein de rapportar a Vus sur dils fatgs e dil curiu e passau en nossa familia de cantadurs. En num della suprastonza, lessel primariamein exprimer in amicabel e salid e beinvegni a tuts ils cheu presents che han giu tonta premura e creanza de dar sua-tientscha anoss'invitaziun. In ni l'auter ch'ei buca sepresentaus ni insumma staus naven gia duront il temps d'exerceci, di ni tratga forsa: O la finala setracta quei mo d'ina uniun de cant ed ei meins impurtond e de pintga muntada. In tal patertgar fuss segiramein fauls, e superficials, e sut neginas condiziuns aprobabels. In um, seigi el giuvens ni vegls che ha buca mo il matrealissem el tgau, sto era saver apreziar <sup>il</sup> cant ton sco el sa e po. Il poet Alfons Tuor di:

Il cant ei in dun, in scazi divin,  
Che legra e conforta nies cor senza fin.

Ultra de quei eis ei ina certa obligaziun morala, de propagar e cultivar il cant e cunzun il romontsch.-Aung dapli: Sper la lavur quotidiana cun sias stentas e travaglias, ei ina canzun cantada da cor sco in vér balsam per l'olma, che ulivescha forsa beinenqual val e e valetta ella veta dil casrtgaun.

La historia dil Chor de Vallada de Tujetsch ei aung cuorta. Jeu creiel denton d'astgar pretender ruasseivlamein, che nies Chor ha ademplier entochen oz honorificamein siu pensum. Per il success contonschiu en quels 3 onns, havein nus en emprema lingia d'engraziar a nies zun fūdau e premurau dirigent sgr. Giusep Huonder il qual ei en sia materia tenor nies giudicar ina apreziada capaciad. Sia gronda lavur e pazienza savein nus buca remunerar e preziar avunda. Nus sperein denton ch'el hagi tonta capientscha per nus sempels tuatschins. En ~~connex~~ quei connex lessel era haver engraziu ad in e scadin dils cantadurs, che ein ora ed ora stai stateivels, demussau tonta premura e prestau tonta lavur e sacrifici per quei niebel ideal de cant en nossa vallada. Nus essen stai el cass de mantener entochen oz in respectabel diember cantadurs de 18 entochen 70 onns, naven da Bugnei entochen a Dieni. Jeu sefidel e sperel era, che quei bien spert semantegni e prospereschi schizun aung pli fetg egl avegnir. Senza scrupel, astgel ~~XXXXXXXXXXXX~~ cussegljar a Vus babs e mummas de recumandar a Vos fegls de separticipar a quei cant. Vus fegls, stimulai Vos babs leutier, sina quei ch'els restien giuvens. In ulteriur engraziament debitein nus ~~visavi~~ specialme in visavi in nies commember activ e quei pertucca nies Sur caplon Albin de Rueras. El formescha (silmeins) ina part dell'olma de nies Chor ed ha entras sia premura, dau in exempel de stateivladad e preseveranza.

La participaziun  
di Maria Lucia

Egl onn de cant de 1962 havein giu .49. exerccecis de cant. Per miez matg havevan preparau in concert a Rueras. Muort in cass de zoppina havein denton stoviu refierer quel per il meins e giu 3 produzioni, nummadamein ils 10, 15 e 17 de zercladur. La frequenza sco era il success ein stai cuntentiveis. Duront la stad havein vuliu prender empau pli lev. La suprastonza haveva previu e concludiu de dar duas produzioni cun caschun de fiasta e quei ina gada a Sedrun la fiasta dil s. Scapulier ed a Rueras la fiasta dil Chor de Maria. La secunda produzion ha saviu vegnir tenuta, demai che la partizipaziun per quei exerccecis fuva buca sufficienta. Nus sperein denton che nus saveien in'otra gada prender suenter quella munconza.

1 most 1 produzion sin invitaziun dell'uniun de trafic

25.11.62. Ina cantata en cooperaziun cum in chor de ditians e matians e cius scolars. In tutt ca. 150 participants. Giu lieu success e cuntentan egl auditon

Sut datum dils 6 de fenadur havein obteniu da nossa consora de Lucerna Chor Viril Romontsch la damonda, schebein nies Chor de Vallada fuss prompts de termetter ina delegaziun sco secziun de padrinadi, a caschun dell'inauguraziun de sia bandiera. Cun caschun d'in exerceci de cant eis ei vegniu concludiu de dar suatientscha a quella damonda. Quella fiasta ha giu ligg ils 21.10.62. alla qualla 6 commembers de nies Chor han priu part sco stau sentelgiu, numnadamein:

Battesta Soliva actuar, Baseli Gieriet <sup>caschun</sup> actuar, Gion Andriu Monn, Baseli Huonder, Giusep Cavegn ant.actuar ed Alfons Berther pres. Ei interessescha forsa Vus ed igl ei da nossa vart era giustificau de dar in cuort rapport sur dil decuors de quei di. Primariamein savein alegar, che nus essen vegni retschrats leugiu en tutta cordialitad ed era vegni teni de vers hosps. La fiasta ufficiala ha cuzzau naven da miez-di entochen allas siat d.s. Sgl'emprem act ei stau la part eclesiastica cun in til ella baseglia de Nossaduna sil Wesemlin (claustra dils caputschins) nua che nies convischin Sur prof. Christ. Monn de Rueras ha fatg las funcziuns, assistius d'in ulteriur convischin frater Vigiel (Silvio) Deragisch. Silsunter ein ins puspei returnaus en til anavos tier la part profana. La sala dil hotel Kolping ei prest stada emplenida e quei dals 35 commembers dil Chor Romontsch cun sias familias grons e pigns ed aung in pèr uniuns e delegaziuns hospitontas. Il comite d'organisaziun ha veramein capiu de tschentiar si in bi program embelius cun canzuns e discuors sin tuttats varts. Sundel selubius de trer ora mo entgins detgls ord il plaiddil president dil Chor Rom de Lucerna sgr. dr. Placi Cavegn de Rueras. El di d.a.:

L'encarschadetgna per la patria romontscha ei buca vegnida sminuida. Fas ti ina viseta tier quel ni tschel romontsch giu cheu ella bassa, quasi dapertut vegnas ti ad engartar in maletg ni in'otra regurdientsch dil vitg ni uclaun leusi en tiara romontscha. L'encarschadetgna per la patria bandunada, gl'anim per cant e cultura romontscha, han spontanamein inflamau varga 30 umens, ils quals ein ils 26.6.61. seradunai ed han fundat il Chor Viril Romontsch Lucerna. In onn suenter pia gia ils 24.6.62. participaziun all' fiasta cantunala de cant a Beromünster. Bugen: havessen nus viu, sche nossa secziun de padrinadi, il giuven Chor de Vallada Tujetsch, havess completamein saviu esser presents cheu. Deplo- rablamein ei quei ord differentes motvs buca stau pusseivel. Grond plasche havess ei fatg a nus de saver solidar cheu en nies miez siu dirigent sgr. ~~sim~~ scol. Giusep Huonder. Sgr. scol Huonder ei en tiara romontscha, quei che partegn cant e musica ina personalitad buca nunenconuschenta. Il megler exempel de sia capacitad ein stai ils gronds success ch'el ha giu tochen da cheu cun il valent Chor de Vallada Tujetsch. Jeu sundel perschuadius che ins vegn aung savens ad udir e leger de quei chor. Jeu sai ch'il Chor de Vallada Tujetsch ha cun grond plascher surpriu la missiun sco secziun de padrinadi. Nus tuts ils commembers dil Chor romontsch Lucerna sperein che quei pass seigi staus l'entschatta d'in contact amical denter ils cantadurs al pei dil Badus ed ils cantadurs al pei dil Pilatus. Schei a Vos cantadurs che nus sperein beingleiti de saver solidar il Chor de Vallada Tujetsch cheu en il marcau dellas glischs. In cordial engraziament per il survetsch prestau.

Ord quels plaids savein nus prender, ch'igl ira naven ei era buca adina tut. Il tratsch jester ei beinduras aung pli carpus che quel de si'atgna patria. Pér lu e leu san <sup>in</sup> apreziar ebdretg l'enconuschientscha e l'unitad in cun l'auter. Sche nus essen pia avon paucs onns seriusamein sedecidi ed era stai el cass de fundar in Chor Viril de Vallada, las portas dil qual ein aviartas per scadin, sche lein nus mussar nossa forza d'unitad e perseveronza per <sup>per</sup> il grond e bi ideal de cant. Jeu concludel culs plaids dil pres. de Lucerna: Preciai amitgs de cant. Laschai luvrar nus aspramein vinavon, per la cultivaziun e promovaziuns de cant e cultura romontscha, la nobla jerta artada da nos babuns.

Rapport annual per la radunonza generala dil  
Chor de Vallada dils 29.10.1963.

Preciau sgr. dirigent,  
Preciai cantadurs e camerads.

En num della suprastonza lessel en emprema lingua exprimer in cordial ed amicabel salid e beinvegni a tuts participonts de nosssa hodierna radunonza generala. La presenxa ded in e scadin documentescha danovamein la stema e la stateivladad de nies bi e dign intent d'in vér e valent cant viril.

Cun plascher savein nus constatar oz, che nus havein ~~paspei~~ var~~ghentau~~ in on de cant en emperneivla unitad ed amicablidad. Igl ei in aspect admirabel, de veser mintgamai ina tala ~~rix~~ raspada ded umens giuvens e vegls che serimnan ~~staxon~~ cun slontsch ed ardiment entuorn nies premurau e respectau sgr. dirigent. Nus vegnin buca ensemen forsa per esser naven da casa (anzi), mobein ord intent cultural ed era per schar plidar il cor sur nies patertgar e ~~sentir~~ <sup>sentir</sup> quantitativ.- Sch'il Chor de Vallada de Tujetsch ei en quels 4 onns de sia existenza svonzaus sin in respectabel scalem (resalvau il consentiment dil sgr. dirigent), sche havein nus d'egraziar quei prinziplalmeim e prinziplalmeim a nies bien, capavel e premurau sgr. dirigent Giusep Huonder. El lubescha denton ~~era~~ denton era d'exprimer in laud ed engraziament e tuts ils cantadurs che ein stai entochen oz aschi stateivels, premurai ed obedeivels seigi visavi il dirigent sco era visavi las prescripziuns statutaricas.

Culs exercecis de cant digl unviern 62/63 havein pli u meins priu silla schuviala leva e quei ord risguard dils onns avon e demai che havein era buca <sup>giu</sup> de sepreparar sin concerts. La primavera havein giu de dar ina produczion per il radio, che ha dau ina mudesta mo tuttina ina beinvegnida intrada. Ina pli gronda sorpresa havein astgau ~~re-~~tscheiver ils 27.6.63. nua che ~~che~~ nus havein astgau dar ina produczion als 350 hosps della N.O.K. cun caschun dell'inauguraziun de nossas ovras electricas. Cun plascher havein nus naturalmeim era acceptau la purschida fatga silsuenter, per rinforz de tgerp e spert. Ultra de quei ha nosssa cassa giu in special cletg, cun saver registrar per nossas prestaziuns de quei di in regal de frs.500.-. Jeu lessel era da quest liug anora haver engraziu als donaturs grondameim per suenter. Per de quellas caschuns ed empreneivels muments, essen adina sin posta! Tenor conclus della suprastonza fuv'ei previu de cantar a Sedrun: la fiasta de s. Vigeli, gl'emprem vost ed a Rueras la fiasta dil Chor de ~~Maria~~. Quei ei vegniu exequiu cun exepziun della produczion a Rueras, la qualla ei deplrablameim buca stada pusseivla demai ch'il sgr. dirigent fuva quei di en absenxa. Ins vegli perstgisar quella munconza. El ravugl della suprastonza cun ils revisurs, havein discuriu surlunder e priu en egl, de sepudent cun caschun d'in exercecis cantar inagada entginas canzuns als vischins de Rueras, suponent ch'ins mondi d'accord cun quella idea.-

Duront igl on 62/63 han 64 commembers priu part dil Chor de Vallada. Allentschatta ein in per extrai ord raschun motivada ed ~~audre~~ sein returnai u vegni da niev, als quals jeu lessel era far in special beinvegni. Exercecis havein giu .... e la frequenxa ei stada buna tochen fetg buna. Jeu engraziel per tutta bunaveglia demussada.

Concludel miu cuort rapport cun animar e stimular in e scadin de star stateivlex a nosssa devisa e de mussar che nus seigien umens che ein el cass de mussar ch'igl ei tonaton bi ed adificont d'enramar la lavur e veta quotidiana cun in bi cant viril e quei per la cultura ed il pievel de nosssa biala val.

<sup>per</sup> Il Chor de Vallada Tujetsch vivi e prospereschi vinavon en buna harmonia.

Camischolas, 29.10.1963.  
Alfons Berther pres.

Rapport annual per la radunonza generala dil  
Chor de Vallada dils 3. 11. 1964.

---

Preziau signur dirigent,  
Preziosi cantadurs e camerats.

Per vegnir suenter a mi'obligaziun hiel oz per la radunonza generala de noss'union de dar in rapport sur dil curriu e passau enteifer igl onn vargau.

En num della suprastonza lessel oravontut admeter solid e beinvegni a sgr. dirigent als preziosi cantadurs, sco era e nos comembers passivs, ils quals la suprastonza en union cun la commisiun de quens ha priu per bien ded era envidar questa sera per star en cumpagnia cun nus.

Suenter 5 onns d'existenza d'il chor de vallada savein mirar anavos sin in fritgeivel opperar per la cultivaziun de cultura en nosa vischnanca. Bein fa mintgaton era enqual scarpetsch valer, il qual ei per ordinari adina leu da casa nua ch'ins vul stin chentar la giuvna frastga cun ragische aung buca s'infirmidas e fermes, mo plantada sin sulom per bien d'in e scadin. Preziosi e cars camerats: Nus lein star e stein era stateivels a nossà cuminonza ed aschia documentein che nus essan el cass era de surventscher scadina difficultat. Quei havein demussau durond igl unviern vargau cun prender aschi stedi part a noss exerzezis de cant, tier ils quals plirs da nus e quei per part vegls e per part giuvens han mai giu in'absenza. A tals descha ei ina speziala reconuschientscha ed engraziamant.

Igl onn d'exerzezis 63/64 ha pretendiu ualti grond sacrifici da part da sgr. dirigent, sco era dal singul cantadur. La raschun prinzipala leutier ei stau la fiasta de cant che ha giu liug ils 3. de matg a Rueun.

Tier la fiasta de cant astgein era aung menzionar in autra fiasta en nosa pleif e quei ei la messa nuviala da nies convischin sur Giusep lacomet, la quala il chor ha astgau delectar cun entginas canzuns durond il gentar de fiasta.

En union cun scolars da Muster havein aranschau in concert e dau quel a Sedrun en preschientscha d'in cuntenteivel auditori.

Sco usitau ha il chor de vallada era igl onn vargau embelin  
cun canzuns duas fiastas ecclesiasticas e quei per s. Vigeli a  
Sedrun e per Chor de Maria a Rueras.

Sin plazza publica ad occasiun profana ei vegniu cantau la sera  
digl emprem d'nost a Sedrun.

Cun noss'unium marschan e sesprovan de dar neu tut lur pusteivel  
per in bi cant viril 57 cantadurs. Da quels ein 4 intrai dapi  
in onn en nossa retscha.

Concludent miu rapport animeschel scadin cantadur de star fideivels  
e semetter en cun tutta curascha vinavon.

Il chor de vallada vivi e prospereschi era egl avegnir.

Rueras, ils 3. de nov. 1964

Gion Chr Caduff ,pres.

Rapport annual per la radunonza generala dil

Chor de Vallada dils 14.11. 1965

---

Preziau signur dirigent,

Preziai cantadurs,

Suenter ualti exact 6 onns da sia existenza, stein puspei avon la radunonza generala dil Chor de vallada. En num della supastonza admettel en emprema lingia salid e beinvegni a nies zun preziau signur dirigent, sco era a scadin commember da noss'uniun. La presenza ded in e scadin documentescha la stema e stateivladat da nies bi e dign intent cultural, entras bein mantener e promover in bi cant viril.

Cun plascher savein puspei constatar, de haver vargentau in onn d'emprova en emperneivla unitat ed amicabladat.

Il diember dils cantadurs ei empau sereduzius, quei denton generalmein buca per quei ch'ei havess muncau interess, anzi ord raschun de sanadat u auters motivs ch'ins sto era renconuscher. Da l'otra vart havein era survegniu forzas novas, dals quals nus sperein ch'els hagien ina buna impressiun e seigien tier noss'uniun da casa e stetien stateivels. Bi ed emperneivel ei senza dubi, nua che giuven e vegl formescha in' unitat, ed ils ligioms denter vitgs ed uclauns ein ferms e dattan caschun ad in emperneivel conversar.

Igl onn d'exerzezis 64/65 ei staus anzi pli levs che quel digl onn avon, demai ch'igl ei stau negina fiasta de cant. En tut havein giu 31 emprova de cant ( senza quellas avon las produenziuns )

Ils 7 e 9 de matg havein dau on concert, unius cun in giug humoristic "da Turitg". La frequenza ei stada plitost fleivla, cunzun tier l'emprova. Il giug ha signur postenent Sigisbert Giossi mussau e cun quella caschun engraziein nus era ad el per sias breigias e stentas.

A caschun de nossas fiastas ecclesiasticas ha il Chor de vallada cantau, e quei sin giavisch da nossa lud. suprastonza communal per la fiasta da s. Vigeli e per la fiasta dil s. rusari, e cun lezza caschun era per comiau da sur caplon Maissen.

A Rueras era previu de cantat per la fiasta dil Chor de Maria, denton ei exepzionalmein quei di stau bialaura ed ei vegniu rischlau, aschia che la fiasta de suentermiezdi ei curdada ora. Denton havein astgau dar ina produenziun a caschun della fiasta de comiau da nies meriteivel commember sur Baseli Albin.

Buca emblidar astgein, e mereta aung inaga menziun dell'undrientscha viers nies meriteivel e senior dils cantadurs signur Vigeli Monn da Bugnei, che ha per il di de producziun ils 9. de matg compleniu 70 onns. Nus clamein teni la dira Vigeli, vies exempel e premura per il cant porta fretg e fa honor a Vus ed agl entir Chor.

Sin giavisch dell'uniun de cura e trafic ei vegniu cantau era uonn sin piazza publica la sera digl empren d'uost.

Duront igl onn 64/65 han 52 cantadurs priu part, e formau il Chor de vallada. Jeu engraziel a tuts aung inaga e supplicheschel de star fi= deivels.

Concludent miu sempel rapport giavischel ch'il Chor de vallada vivi e pros pereschi vinavon per bien dil pievel e de nossa biala val.

Rueras, ils 13 de november 1965

Gion Chr Caduff, pres.

Rappoort annual per la radunanza generala dil Chor de Vallada dils  
21.11.66

---

Preziau signur dirigent,  
Preziai cantadurs.

Cum impauct retard, denton quai ord risguard sin il concert da nos concantadurs a Mustèr stein puspei tier la radunanza generala da noss' uniu da cant. Quei ei il di, che arva las portas per in niev temps d'exerceci, mo era che oblighescha la suprastanza de dar plaid e fatg sur curiu e passau egl onn vargau.

Igl onn da cant 1965/66 ha entschiet cun iglemprem exercerci dils 15 da november e finius cun il davos dals 18 d'avrel. en quei interval havein puspei sut la capavla direcziun da nies premurau e fideivel dirigent signur scolast Giuseppe Huonder da Mustèrscudiu ina partida canzuns novas sco era veglias, per en uniu cun il chor viril da Mustèr<sup>Nadal</sup> saver delectar la populaziun cun in concert. Quel ei vegnius daus ils 2 da mars e da pastgas.

ei fuva ers stau quels davos onns il cass che nus astgavan cantar la sera digl emprem d'uost, denton uonn ha la suprastanza da quel' organisaziun preferiu il chor mischedau da Sedrun, e quei sa a nus era esser endretg. A caschun dellas fiastas ecclesiasticas ei ord motiv prinzipalmein dell' aura buca vegniu cantau. Forsa sa quei vegnir priu suenter egl onn proxim. En il 7 avel onn da cant han 50 cantadurs actiivs formau il chor de vallada. Il spert che ha regiu denter cantadurs/giuvèn e vegl e dirigent ei staus fetg bials e quei giavischein era egl avegnir.

Raccolta ha denton era la mort fatg uonn tier la retscha da cantadurs. Ils 3 da settember ha il segner clamau nies camerat e bab da familia tier l'armada gronda. Tenor statutas han nossa bandiera acumpignau il defunct alla fossa ed il chor ha dau ad el comiau cun ina canzun.

Era oz lein nus seregurdar en pietat dad el cun sesalzar ed in cuort memento.

Preziau signur dirigent e cantadurs. Lein buca setar<sup>feh</sup> sestermentar ni da quei ni dad auter e semetter cun curascha a nies pensum. Il diember de cantadurs astga buca sereuzir mobein ha da crescher ed il chor da vallada Tujetsch flurir e prosperar. Quei giavischa, e perquei lein nus tuts sestentar.

Vies president

Giow Chr. Caduff.



Rapport annual per la radunonza generala dil  
Chor de Vallada dils 28.11.1967

---

Preziau signur dirigent,

Preziai cantadurs,

En num della suprastonza haiel l'onur de purtar salid e beinvegni a tuts partiziponts tier nossa radononza generala. Tier quella descha ei, che la suprastonza ha de dar plaid efatg sur quen e bilanza, sur l'activitat dell'uniun egl onn passau, e far las preparativas per in niev onn da cant.

Cun il datum dals 28. da november 1966 havein egl onn vargau entschiet cun ils exercecis da cant e concludiu quels ils 27. d'avrel 1967.

Per sepreparar a differentas ocasiuns ei aung vegniu fatg 7 ulteriuras emprovas.

Sco dirigent gia dapi la fundaziun dil Chor ha signur scolast Giusep Huonder, Mustèr funzionau. Ad el descha ei oz spezialmein d'admeter in sincer engraziament, ch'el ha cun tutta premura ed inschignusadat diregiu e cheutras manteniu nies Chor.

A. caschun dils davos exercecis ha el abdicau sco dirigent, muort bia lavur e sanadat. El exprima denton, ch'el fetschi quei cun in cert schar encrescher, ed el vegni mai ad emblidar las bialas uras en cumpagnia cun ils cantadurs da Tujetsch.

Oz descha ei a nus spezialmein d'engraziar grondamein a nies sgr. dirigent partent per tuts buns survetschs prestai, e siu num vegn vinavon a figurar alla testa per la pusseivladat da renaschientscha ed existenza dil Chor da Vallada da Tujetsch.

A raschun da quell'abdicaziun, essan stai sfurzai d'encurir in niev dirigent. Ei dapenda puspei dalla pusseivladat d'existenza dil Chor e quei ha nies convischin signur scolast Stiafen Berther da Gamischolas era viu en ed el dat plaid de tenor sias forzas surprender quel. Tut respect visavi nies giuven scolast per sia premura e curascha. Nus lein exprimer ad el nies cordial engraziament, cun dar ina honorifica tscharna d'elecziun.

Mirond anavos sin l'activitat dil Chor egl onn passau, savein constatar, che nus havein era luvrau ensemen cun las outras uniuns en vischnaunca. Quei ei natural buca per intent d'augmentar la cassa mobein ina buna metoda per anflar bien contact cun las outras uniuns

che vala senz'auter pli bia ch'empau dapli cassa.

Schizun cun societats ordeifer ils confins da nossa vischnaunca e quei cul Chor viril da Muetèr ed il Chor baselgia da Segnas havein astgau colaborar. Bialas ein stadas las uras d'exercecis per part a Sedrun, Mustèr e Segnas sut la direcziun da nies dirigent signur Gisep Huonder, nua che varga loo cantadurs formavan in Chor. Igl intentda quella reuniun ei stau la fiasta comemorativa da Hans Erni dils 30.d'avrel a Trin.

Buca d'emblidar de far menziun ei la fiasts da messa nuviala della stad vargada, nua ch'in convischin da Sedrun pader Vigeli Deragisch ha ascendiu per l'emprema gada igl altar, ed il Chor da vallada ha astgau delectar la tschentada cun produziuns duront gentar e ~~est~~ suenter-miezdi.

Engraziont aung inagada per tut bi ed emperneivel concludel miu rapport e supplicheschel in e scadin giuven e vegl de star fideivels e semetter en cun tutta curascha en in niev onn da cant.

Rueras, ils 28.da november 1967

Gion Chr. Caduff, pres.

Rapport annual

Preziau signur dirigent,  
Preziaz cantadurs,

Cun in per cuorts patratgs lessel aunc schar reviver inagada  
la sesiun de cant 1967/68.

Cuort suenter radunonza generala dils 28. de november 1967 havein  
entschiet culs exercecis de cant. Igl intent de quels exercecis ei  
bein de saver porscher a nos vitgs ed insumma all'entira populaziun  
indigena ed jastra ils fretgs recaltgai ord nossas per part stun-  
clantusas seras de cant.

34 gadas havein nus unfriu  $1\frac{1}{2}$  h temps, per mantener ed augmentar la  
cultura de cant en nossa biala val. Nus lein oz a caschun della ra-  
dunonza generala engraziar da cor a nies niev e giuven dirigent sgr.  
Stiafen Berther per sia premura e pazienza ch'el ha giu cul Chor du-  
ront igl onn ora. Nies giuven scolast ha diregiu il Chor de Vallada  
per l'emprema gada e quei cun grond succes. En num de scadin cantadur  
les jeu gratular ad el. Nus havein tutta speronza ch'el stetti fi-  
deivels als cantadurs e cant, per silmeins in tschupel decenis.

Cantadurs lein dar curascha ad el vinavon cun mussar buna disciplina  
e maximala frequenza.

Era a nies giuven vicedirigent sgr. studentt Giusep Caduff de Rueras  
engraziel el num dil Chor per siu interess e sia premura e spezial  
per siu agid duront l'absenza de nies dirigent.

Nus cantadurs havein era cheu tutta speronza ch'el resti in fideivel  
commember e mussader.

Avon che passar tiel il programm de lavur 1969 lein nus aunc inaga  
examinar il pensum de lavur 1967/68.

Cun plascher savein constatar d'aver varghentau in onn de cant cun succes,  
buna unitat ed amicabladat. Il diember de commembers havein puspei saviu  
augmentar essent quel gleiti giu sin in minimum.

5 Canzuns havein empriu duront igl onn de cant. Era las producziuns  
puplicas havein tenu tenor usit. Allafin dil meins de matg entschatta  
zercladur havein menau atras in concert cun succes per cant e cassa.

Tut ei naturalmein era buca reussiu suenter notas: Aschia havein tra-  
laschau beinenqualga de far ils excercecis de cant a Rueras e quei cun  
e senza raschun. Era cun nossas seras de recreaziun eisei buca iu  
tut tenor giavisch. En quels dus puncts numnai stuein egl avegnir  
semegliurar considerablamein.

Nus lein dar l'entschatta alla sesiun de cant 1968/69 cun metter tut  
nossas forzas pusseivlas per il bein reussir dil niev programm de  
lavor.

Preziai commembers dil Chor; aunc inagada engraziel a scadin cantadur  
en spezial a dirigent e vicedirigent sco era a nos collegas dil comité  
per la buna collaboraziun.

Jeu clomel tier alla radunonza

viva il chor

viva ses commembers

*il president*  
*W. Aris*

Radunonza generala dil Chor de Vallada dils 25. de nov. 1969

Cun la radunonza generala ded oz va puspei ina sesiun de cant alla fin.

Aunc inagada lein nus examinar cun in per patratgs il reussiu e las difficultads che la sesiun de cant 1968/69 ha purtau. En varga 30 exerchezis havein empriu 5 biallas canzuns ed exercitau pruamein las canzuns veglias. Ils exerchezis digl unviern ein stei frequentai detg stupent, aschia che havein ils 7. ed ils 11. d'avrel saviu dar concert e quei cun bien success. Las producziuns publicas havein puspei tenuu en usit. Alla fin dil meins matg entschatta zercladur havein puspei giu ualti stedi exerchezis de cant. Las preparaziuns tier mintga producziun ein vegnidas preparadas cun gronda premura ed interess da nies ludeivel dirigent Stiafen Berther. Sin invitaziun de la commissiun de baghegiar baselgia S. Clau a Curaglia havein nus giu caschun de dar concert ils 22. de zercladur a Medel. Il recav de quei concert ed il bazar va en favur della renovaziun baselgia de S. Clau a Curaglia. Buca ina dellas suletas gadas havein era cheu puspei giu caschun de far dil bien. Extraordinariamein havein aunc dau ils 6. de settember in pign concert a Rueras ensemen cun la musica e nos collegas de cant digl Argau. Era quei modest concert havein dau per nossa cuntentientscha e per cuntentientscha de nos auditurs. Cun plascher savein constetar ch'il Chor ha tuttina prestau lavur tenor sia fin e mira duront igl onn vargau. Cheu lein nus buca emblidar ded engraziar a nies Sgr. dirigent Stiafen Berther per sia gronda premura ed il success ch'el ha giu cun il Chor duront igl onn ora. Engraziar lessel era a nies convischin Sgr. Felici Monn per la direcziun dil toc humoristic "Fauls suspects" a caschun dil concert dils 7. ed 11. d'avrel 1969. Plinavon lessan engraziar a tuts quels e quellas che han segideu per il bein reussir dil toc humoristic. Naturalmein ei il concert sco era il lotto dils 14. de december 1968 stei duas bunas intradas per la cassa.

Tut ei naturalmein era buca reussiu tenor notas. Cheu lessel en l'emprema lingia haver menzionau e sutastrihau la meins buna frequenza dils exerchezis suenter il concert digl avrel. Lu ha la voluntad d'entgins commembers schau empau suenter e quei ha giu influenza sin la partizipaziun sco era la punctualitad dils exerchezis. Quellas duas objecziuns lubis vus a mi! Jeu sai mo bein avunda che quellas remarclas ual fatgas valan absolutamein buca per tuts ils commembers. Jeu hai denton tutta speranza che scadin cantadur anfli mias objecziuns per bein fundadas.

Nus lein entscheiver nossa sesiun de cant 1969/70 cun ir stedi e punctualmein als exerchezis. Lein metter tut nossas forzas per il bein reussir dil niev pensum de lavur.

Preziai cantadurs:

priu ora la meins buna frequenza dils exerchezis 1969, havein tuttina aunc passentau ina emperneivla sesiun de cant en buna unitad e cordialitad.

En quei senn engraziel a scadin commember dil Chor, a dirigent e vicedirigent, als collegas dil comité per la buna collaboraziun.

Jeu concludel giavischont al Chor, da tuts fideivladat e mo bien prosperar.

il president:  
Hans Jumein